

摘藻堂四庫全書薈要

史部

欽定四庫全書薈要

史部
明史卷一百五十八至
九

詳校官員外郎臣潘紹觀



欽定四庫全書薈要卷六千七百五十一 史部

明史卷一百五十八

大學士張廷玉等奉 敕脩



列傳第四十六

黃宗載

顧

佐

邵陳

玘玘

賈嚴

諫升

段民

吾人紳

章

敞

徐劉

琦啟

吳訥

朱與言

魏

驥

魯穆

耿九疇

軒輓

陳

復

黃孔昭

黃宗載一名屋字厚夫豐城人洪武三十年進士授行人奉使四方未嘗受餽遺累遷司正永樂初以薦為湖廣按察司僉事巨奸宿猾多謫戍銅鼓五開間陰持官吏短長宗載榜數其罪曰不改必寘之法衆莫敢犯武陵多戎籍民家慮與為婚姻徭賦將累已男女至年四十尚不婚宗載以理論之皆解悟一時婚者三百餘家鄰邑效之其俗遂變徵詣文淵閣修永樂大典書成受

賜還任董造海運巨艦數十艘事辦而民不擾車駕北
征徵兵湖廣使者貪暴失期宗載坐不舉劾謫楊青驛
驛夫尋起御史出按交趾時交趾新定州縣官多用兩
廣雲南舉人及歲貢生員之願仕遠方者皆不善撫字
宗載因言有司率不稱職若俟九年黜陟恐益廢弛請
任二年以上者巡按御史及兩司覈實舉按以聞帝是
之及歸行李蕭然不攜交趾一物尚書黃福語人曰吾
居此久所接御史多矣惟宗載知大體丁祖母憂起復

改詹事府丞洪熙元年擢行在吏部侍郎少師蹇義領部事宗載一輔以正宣德元年奉命清軍浙江三年督採木湖湘英宗初以侍郎羅汝敬巡撫陝西坐事戴罪辦事汝敬妄引詔書復職而吏部不言為御史所劾宗載及尚書郭璉俱下獄未幾得釋遷南京吏部尚書居九年乞休章四上乃許九年七月卒於家年七十九宗載持廉守正不矯不隨學問文章俱負時望公卿大夫齒德之盛推宗載云

顧佐字禮卿太康人建文二年進士除莊浪知縣端陽日守將集官僚校射以佐文士難之持弓矢一發而中守將大服永樂初入為御史七年成祖在北京命吏部選御史之才者赴行在佐預焉奉命招慶遠蠻督採木四川從北征巡視關隘遷江西按察副使召為應天尹剛直不撓吏民畏服人比之包孝肅北京建改尹順天權貴人多不便之出為貴州按察使洪熙元年召為通政使宣德三年都御史劉觀以貪被黜大學士楊士奇

楊榮薦佐公廉有威厯官並著風采為京尹政清弊革

帝喜立擢右都御史賜敕獎勉命察諸御史不稱者黜
之御史有缺舉送吏部補選佐視事即奏黜嚴暄楊居
正等二十人謫遼東各衛為吏降八人罷三人而舉進
士鄧棨國子生程富謁選知縣孔文英教官方瑞等四
十餘人堪任御史帝使厯政三月而後任之居正等六
人辨愬帝怒并諸為吏者悉戍之既而暄自戍所潛還
京脅他賄為佐所奏且言暄謀害已詔戮暄於市帝北

巡命偕尚書張本等居守還復賜敕令約束諸御史於
是糾黜貪縱朝綱肅然居歲餘姦吏奏佐受隸金私遣
歸帝密示士奇曰爾不嘗舉佐廉乎對曰中朝官俸薄
僕馬薪芻資之隸遣隸半使出资免役隸得歸耕官得
資費中朝官皆然臣亦然先帝知之故增中朝官俸帝
歎曰朝臣貧如此因怒訴者曰朕方用佐小人敢誣之
必下法司治士奇對曰細事不足干上怒帝乃以吏狀
付佐曰汝自治之佐頓首謝召吏言上命我治汝汝改

行吾當貸汝帝聞之益喜謂佐得大體或告佐不理寃
訴帝曰此必重囚教之命法司會鞠果千戶臧清殺無
罪三人當死使人誣佐帝曰不誅清則佐法不行磔清
於市八年秋佐有疾乞歸不許以南京右都御史熊概
代理其事踰年而概卒佐疾良已入見帝慰勞之令免
朝賀視事如故正統初考察御史不稱者十五人降黜
之邵宗九載滿吏部已考稱亦與焉宗奏辨尚書郭璉
亦言宗不應與在任者同考帝遂責佐而御史張鵬等

復劾宗微過帝以鵬朋欺并切責佐佐上章致仕去賜
敕獎慰賚鈔五十貫命戶部復其家十一年九月卒佐
孝友操履清白性嚴毅每旦趨朝小憩外廬立雙藤戶
外百僚過者皆折旋避之入內直廬獨處小夾室非議
政不與諸司羣坐人稱為顧獨坐云然持法深論者以
為病時雩都陳勉澤縣賈諒先後為副都御史與佐同
舉臺職而蘭谿邵玘官南京與佐齊名繁昌嚴升名亦
亞於玘玘字以先永樂中進士授御史仁宗監國知其

廉直每法司缺官即命玘署有重獄輒付之歷任中外所過人不敢犯宣德三年由福建按察使入為南京左副都御史奏黜御史不職者十三人簡黜諸司庸懦不肖者八十餘人風紀大振居二年以疾卒官玘負氣好侮同列治獄頗刻深然持身廉潔內行修事母以孝聞陳勉與玘同年進士仁宗初以楊士奇薦由廣東副使擢左副都御史信豐諸縣盜起命勉撫之招徠三千六百餘人亂遂定景泰初仕至南京右副都御史掌院事

致仕卒勉外和內剛精通法律吏不敢欺賈諒字子信

永樂中由鄉舉入太學選侍皇太孫說書擢刑科給事

中宣德四年劾清軍侍郎金庠受賄罷之郎中胡珏蕭

翔等十一人御史方鼎三人以不職被劾帝未信命諒

及張居傑密察之得實悉貶官明年又劾陽武侯薛祿

朋比不敬廷中肅然尋拜右副都御史偕錦衣指揮王

裕參議黃翰中官張義等巡視四川江西湖廣按治豪

強不少假正統二年江北河南大水命諒及工部侍郎

鄭辰往振芒碭山盜為患諒捕獲甚衆四年還至德州卒諒內行修居官有風采嚴升建文時進士歷官大理寺右少卿清軍蘇松執法不撓調南京僉都御史與玘同心治事剛果自信嘗著神羊賦以見志焉

段民字時舉武進人永樂二年進士選庶吉士與章敞吾紳輩俱讀書文淵閣又俱授刑部主事民旋進郎中山東妖婦唐賽兒作亂三司官坐縱寇誅擢民左參政當是時索賽兒急盡逮山東京尼及天下出家婦女

先後幾萬人民力為矜宥人情始安車駕北征餉舟由濟寧達潞河陸輓出居庸至塞外民深計曲算下不擾而事集既還與敕巡按御史考所過府縣吏廉墨以聞宣德三年召入京南署南京戶部右侍郎踰年實授又明年改刑部初二部皆以不治聞民至紀綱修舉宿弊以革上元人有為姪毆者憤甚詣通政司告時方令納米贖罪而越訴禁甚嚴犯者戍遼東民上言依定例卑幼之罪得贖而尊長反遠竄揆於理有未安請更擬帝

是之帝以民廉介端謹特賜敕令考察南京百官八年

詔書罪囚自十惡外並減一等有重囚三十餘人例不得赦民亦減其罪後有旨報決乃復追還而逃已數人
民自陳狀給事中年富等劾民帝知民賢不問九年二月卒於官年五十九貧不能殮都御史吳訥稅以衣衾
帝聞命有司營葬成化間葉盛請褒卹不果其後百有餘年始追謚襄介吾紳字叔紹衢州開化人官刑部主事治獄有聲歷郎中拜禮部侍郎成祖謂呂震曰紳出

自翰林可佐卿典禮矣既而為震所擠出為廣東參政
尋召為南京刑部侍郎奉敕考察兩廣福建方面官有
故人官參政素貪黜權要多為之地紳至竟黜之時稱
其公復改禮部正統六年卒於官紳清彊有執澹於榮
利初拜侍郎賀者畢集而一室蕭然了無供具衆笑而
起

章敞字尚文會稽人由庶吉士授刑部主事山西盜發
捕逮數百人敞察其冤留詞色異者一人餘悉遣出明

日訊之留者盜餘非也遷郎中改吏部宣德六年擢禮部侍郎偕徐琦使安南命黎利權國事利遣人白相見禮敬曰汝敬使者所以尊朝廷奚白為利聽命趨拜下坐噉以聲色不為動還致厚贖不受利以付貢使及關悉閱貢物封其贖付關吏利死子麟嗣敬復奉詔往却贖如初正統初纂洪武以來條格使諸司參酌吏無能為奸尚書胡濙寬大敬佐以嚴肅二年十二月卒子瑾亦累官至禮部侍郎徐琦字良玉先世錢塘人其祖諱

成寧夏遂家焉幼力學通經史永樂十三年舉進士授
行人歷兵部員外郎明敏有斷居官務持大體宣德六
年擢右通政使敝使安南亦不受餽還拜南京兵部右
侍郎八年帝以安南貢賦不如額南征士卒未盡返命
琦復往時黎利已死其子麟疑未決琦曉以禍福麟懼
鑄代身金人貢方物以謝帝悅命落琦戍籍宴賚甚厚
正統初與工部侍郎鄭辰考察南畿有司黜不法者三
十人時災異屢見琦陳弭災十事悉嘉納五年命參贊

南京機務十四年進尚書參贊如故有言往年分調南京軍家屬悉宜北徙朝議欲行之琦奏安土重遷人之情也今驟徙數萬衆人心一搖事或叵測事得寢軍衛無學校琦請天下衛所視府州縣例皆立學從之景泰元年靖遠伯王驥贊機務琦專理部事驥解任琦仍參贊四年三月卒年六十八謚貞襄啟琦皆以使安南不辱命著稱安南多寶貨後使者率徙水道挾估客往以為利交人頗輕之弘治時侍講劉戩往頒詔由南寧乘

傳抵其國交人大驚噤依舊制受陪臣拜謁不交一語
越宿即行餽遺一無所受使人要於途固致之卒麾去
與敞以皆為交人所重噤字景元安福人

吳訥字敏德常熟人父遵任沅陵簿生事繫京師訥上
書乞身代事未白而父歿訥感奮力學永樂中以醫薦
至京仁宗監國聞其名命教功臣子弟成祖召對稱旨
俾日侍禁廷備顧問洪熙元年侍講學士沈度薦訥經
明行修授監察御史敬慎廉直不務矯飾宣德初出按

浙江以振風紀植綱常為務時軍犯逃者往往令家人
妄懇逮繫至千人訥請嚴禁即寃不得越告從之繼按
貴州恩威并行蠻人畏服將代還部民詣闕乞留不許
五年七月進南京右僉都御史尋進左副都御史正統
初光祿丞董正等盜官物訥發之謫戍四十四人右通
政李昉者奉使蘇松行事多不謹訥微誡之昉不悅誣
訥稽延詔書等事訥疏辯互為臺省所劾俱逮下獄既
而釋之英宗初御經筵錄所輯小學集解上之四年三

月以老致仕以朱與言代訥博覽議論有根柢於性理之奧多有發明所著書皆可垂於後歸家布衣蔬食環堵蕭然周忱撫江南欲新其居不可家居十六年而卒年八十六謚文恪鄉人祀之言偃祠朱與言字一鶚萬安人永樂九年進士授湖廣按察僉事宣德中遷四川副使合州盜起督吏目熊鼎斬六十餘人賊勢遂衰事聞擢鼎合州同知雅州妖人為亂與言執送京師境內以寧正統元年召為南京右副都御史入代訥領院事

年老致仕卒與言剛方廉慎為政務大體數建白多切時弊家居門庭清肅鄉人有不善惟恐與言知之

魏驥字仲房蕭山人永樂中以進士副榜授松江訓導常夜分攜茗粥勞諸生諸生感奮多成就者召修永樂大典書成還任用師遠薦遷太常博士帝謂曰劉履節為御史九年高皇帝方授是官不輕予人也宣德初遷吏部考功員外郎歷南京太常寺少卿正統三年召試行在吏部左侍郎踰年實授屢命巡視畿甸遺蝗問民

疾苦八年改禮部尋以老請致仕吏部尚書王直言驥未衰如念其老宜令去繁就簡乃改南京吏部復以老辭不允十四年進尚書英宗北狩驥率諸司條上時務多施行景泰元年年七十七致仕驥居官務大體在太常山川壇獲雙白兔圻内生瑞麥皆却不進在吏部有進士未終制求考功同官將許之驥持不可法司因旱卹刑有王剛者惡逆當辟或憫其少欲緩之驥曰此婦人之仁天道不時正此故也獄決而雨正統中王振怙

寵凌公卿獨嚴重驥呼先生景泰初以請老至京師大學士陳循驥門生也請間曰公雖位冢宰然未嘗立朝願少待事在循輩驥正色曰君為輔臣當為天下進賢才不得私一座主退語人曰渠以朝廷事為一己事安得善終竟致仕去驥端厚祇慎顧勁直好別白君子小人恒曰無是非之心非人也家居憂國憂民老而彌篤蕭山故多水患有宋時縣令楊時湖隄遺跡驥倡修螺山石巖畢公諸塘堰捍江潮興湖利鄉人賴之居恒布

衣糲食不殖生產事兄教諭騏雖耄益恭時戴笠行田
間嘗遇錢塘主簿隸訶之答曰蕭山魏驥也主簿倉皇
謝慰而去成化七年御史梁昉言臣先任蕭山見致仕
尚書臣魏驥里居與里人稠處教子孫孝弟力田增隄
濬湖捍禦災患所行動應禮法倡理學勗後進雖在林
野有補治化驥生平學行醇篤心術正大諳世事瞭國
體致仕二十餘年年九十八歲四方仰德有如卿雲百
年化育滋此人瑞臣讀前史有以歸老賜祿畢其身者

有尊養三老五更者有安車蒲輪召者有賜几杖者上
齒德也驥齒德有餘爵在上卿可稱達尊乞下所司酌
前代故事施行帝覽奏嘉歎遣行人存問賜羊酒命有
司月給米三石使命未至而驥卒賜祭葬如禮謚文靖
其子完以驥遺言詣闕辭葬乞以其金振饑民帝憮然
曰驥臨終遺命猶恐勞民可謂純臣矣許之蕭山民德
驥不已詣闕請祀於德惠祠以配楊時制曰可

魯穆字希文天台人永樂四年進士家居褐衣蔬食足

跡不入州府比謁選有司餽之贖穆曰吾方從仕未能
利物乃先厲州里乎弗受除御史仁宗監國屢上封事
漢王官校多不法人莫敢言穆上章劾之不報然直聲
振朝廷遷福建僉事理冤濫摧豪強泉州人李某調官
廣西其姻富民林某遣僕醜李於道而室其妻李之宗
人訴於官所司納林賂坐訴者繫獄久穆廉得其實立
正林罪漳民周允文無子以姪為後晚而妾生子因析
產與姪屬以妾子允文死姪言兒非叔子遂去盡奪其

賞妾訴之穆召縣父老及周宗族密置妻子羣兒中咸指兒類允文遂歸其產民呼魯鐵面時楊榮當國家人犯法穆治之不少貸榮顧謂穆賢薦之朝英宗即位擢右僉都御史明年奉命捕蝗大名還以疾卒命給舟歸其喪始穆入為僉都御史所載不過囊衣尚書吳中贈以器用不受至是中為治棺衾乃克殯子崇至歷官應天尹廉直有父風

耿九疇字禹範盧氏人永樂末進士宣德六年授禮科

給事中議論持大體有清望正統初大臣言兩淮鹽政久壞宜得重名檢者治之於是推擇為鹽運司同知痛革宿弊條奏便宜五事著為令母喪去官場民數千人詣闕乞留十年正月起為都轉運使節儉無他好公退焚香讀書廉名益振婦孺皆知其名以事見誣逮下吏已得白即留為刑部右侍郎屢辨疑獄無所撓屈禮部侍郎章瑾下獄九疇及江淵等議貶其官瑾壻給事中王汝霖銜之與同官葉盛張固林聰等論刑部不公九

疇淵遂劾盛等且言汝霖父永和死土木嬉笑自如不
宜居職時景帝新立急於用人置汝霖等不問瑾如奏
鳳陽歲凶盜且起敕往巡視招撫奏留英武飛熊諸衛
軍耕守招來流民七萬戶境內以安兩淮自九疇去鹽
政復弛景泰元年仍命兼理尋敕錄諸府重囚多所平
反十月命兼撫江北諸府三年三月代陳鎰鎮陝西都
指揮楊得青等私役操卒九疇劾之詔按治且命諸邊
如得青者具劾以聞邊將請增臨洮諸衛戍九疇言邊

城士卒非乏將帥能嚴紀律賞罰明信則人人自奮不
然徒冗食耳乃不增戍邊民春夏出作田秋冬輒徙入
塞九疇言邊將所以禦寇衛明也今使民避寇失業安
用將帥因禁民入徙有被寇者治守帥罪四年布政使
許資言侍郎出鎮與巡按御史不相統事多拘滯請改
授憲職便乃轉右副都御史大臣鎮守巡撫皆授都御
史自九疇始有旨市羊角為燈九疇引宋蘇軾諫神宗
買浙燈事事乃寢災異求言請帝延儒碩公賞罰擇守

令簡將帥優詔報焉天順初議事京師帝顧侍臣曰九疇廉正人也留為右都御史罪人繫都察院獄者不給米九疇為言乃日給一升遂為令已上疏陳崇廉恥清刑獄勸農桑節軍賞重臺憲五事帝皆嘉納是年六月御史張鵬等劾石亨曹吉祥亨等謂九疇實使之遂并下獄謫江西布政使尋調四川明年禮部缺尚書帝問李賢賢曰老成清介無如九疇乃召還既至憐其老改南京刑部尚書四年卒謚清惠子裕自傳

軒輓字惟行鹿邑人永樂末年進士授行人司副宣德六年用薦改御史按福建剔蠹鋤奸風采甚峻正統元年清軍浙江劾不職官四十餘人五年言祖宗設御史官為職綦重今內外諸司有事多擅遣御史非制請禁之立報可是年起擢浙江按察使前使奢汰輓力矯之寒暑一青布袍補綴殆遍居常蔬食妻子親操井臼與僚屬約三日出俸錢市肉不得過一斤僚屬多不能堪故舊至食為一豆或具雞黍則人驚以為異時鎮守內

臣阮隨布政使孫原貞杭州知府陳復仁和知縣許僕
居官皆廉一方大治溫處有銀場洪武間歲課僅二千
八百餘兩至宣德時增至九萬餘兩民不堪命帝即位
以大臣議罷之至是參政俞士悅請復開謂利歸於上
則礦盜自絕下三司議輒力持不可乃止既而給事中
陳傅復請朝廷遽從之遂致葉宗留之變會稽趙伯泰
宋苗裔也奏孝宗理宗及福王陵墓俱為豪民侵奪御
史王琳謂福王降於元化去山陰安得墓伯泰不平復

訴帝命輓及巡按御史歐陽澄覆按輓言福王蓋衣冠之藏伯泰言非誣詔戍豪民於邊停琳等俸遭親喪起復十三年奏陳四事俱切時弊帝悉從之景帝立以右副都御史鎮守浙江景泰元年命兼理兩浙鹽課閩賊吳金八等流劫青田諸縣輓與原貞討平之賊首羅丕廖寧八復自閩抵浙輓等防遏有功進秩一等明年改督南京糧儲五年復改左副都御史掌南院事考黜御史不職者數人天順元年二月召拜刑部尚書數月引

疾乞歸帝召見問曰昔浙江廉使考滿歸行李僅一麓
乃卿耶輓頓首謝賜白金慰遣之明年南京督理糧儲
缺官帝問李賢大臣中誰曾居此職者賢以輓對且稱
其廉乃命以左都御史往八年夏以老乞骸骨不待報
徑歸抵家趣具浴欠伸而卒輓孤峭遇人無賢否拒不
與接為按察使嘗飲同僚家歸撫其腹曰此中有贓物
也在南都都御史張純置酒延客輓惡其汰不往徹饌
遺之亦不納歲時詣禮部拜表慶賀屏居一室常撤燭端

坐事竣竟歸未嘗與僚友一語僚友聞其來亦輒避去
不樂與之處量頗褊隘御史有訐人陰私者輒獎其能
嘗令御史劾南京祭酒吳節節亦發輒私事衆頗不直
輒然清操聞天下與耿九疇齊名語廉吏必曰軒耿陳
復福建懷安人輒同年進士由戶部主事知杭州廉靜
無私獄訟大省日端坐堂皇與曹掾講讀律令而已遭
喪部民乞留詔起復未幾卒輒倡僚屬助之乃克斂吏
民相率致賻其子盡却之稱貸歸

黃孔昭黃巖人初名曜後以字行改字世顯年十四遭

父母喪哀毀骨立舉天順四年進士授屯田主事奉使

江南卻餽弗受進都水員外郎成化五年文選郎中陳

雲等為吏所訐盡下獄貶官尚書姚夔知孔昭廉調之

文選九年進郎中故事選郎率閉門謝客孔昭曰國家

用才猶富家積粟粟不素積豈足贍饑才不預儲安能

濟用苟以深居絕客為高何由知天下才俊公退遇客

至輒延見訪以人才書之於冊除官以其才高下配地

繁簡由是銓敍平允其以私干者悉拒之嘗與尚書尹
旻爭至推繁盛怒孔昭拱立俟其怒止復言之旻亦信
其諒直旻暱通政談倫欲用為侍郎孔昭執不可旻卒
用之倫果敗旻欲推故人為巡撫孔昭不應其人入都
謁孔昭至屈膝孔昭益鄙之旻令推舉孔昭曰彼所少
者大臣體耳旻謂其人曰黃君不離銓曹汝不能遷也
為郎中滿九載始擢右通政久之遷南京工部右侍郎
有官地十餘區為勢家所侵奏復之奉詔薦舉方面以

知府樊瑩僉事章懋應後皆為名臣郎官主藏者以羨銀數千進斥退之掘地得古鼎急命工鐫文廟二字送之廟中俄中官欲獻諸朝見鐫字而止孔昭嗜學敦行與陳選林鶚謝鐸友善並為士類所宗弘治四年卒嘉靖中贈禮部尚書謚文毅子備亦舉進士為文選郎中備子綰以議大禮至禮部尚書自有傳

贊曰國家盛時士大夫多以廉節自重豈刻意勵行好為矯飭名譽哉亦其澹嗜欲恥營競介特之性然也仁

宣之際懲吏道貪墨登進公廉剛正之士宗載佐銓衡
顧佐掌邦憲風紀為之一清段民吳訥魏驥魯穆嶠然
秉羔羊素絲之節軒耿孔昭矯厲絕俗物不能干章啟
徐琦劉戩律已嚴正異域傾心廉之尺尚也卓矣

明史卷一百五十八

欽定四庫全書

明史卷一百五十八考證

顧佐傳佐上章致仕去

臣嚴福按是時陝西布政司

周景奸賊無度佐累置之法帝累釋之佐遂以風疾乞歸見雷禮列卿記謹附識

章敞傳章敞會稽人

臣嚴福按太學題名碑敞為永

樂二年進士謹附考

魏驥傳王振怙寵凌公卿獨嚴重驥呼先生

臣嚴福

按驥初為吏部侍郎途遇王振不為避振諧之驥一日於帝前言其故且言臣不足惜如名器何溫旨慰之見雷禮列卿記謹附識

耿九疇傳條奏便宜五事

臣嚴福按九疇所奏五事

曰復竈戶均歲派出賑濟節榷鹽立刑官見獻徵錄
謹附考

亨等謂九疇實使之

臣嚴福按是時邊境多事九疇

謂罪由石亨將率諸御史廷劾之事泄反為所誣帝

察其寃僅謫外見雷禮列卿記謹識

欽定四庫全書薈要卷六千七百五十二

史部

明史卷一百五十九

大學士張廷玉等奉勅修

列傳第四十七

熊概

葉春

陳鎰

李儀

丁璠

陳泰

李崇

曾暉

賈銓

王宇

崔恭

劉攽

宋那宥傑

李

侃雷復
李綱

原傑

彭誼

牟俸

夏堦子錡

高明

楊繼宗

熊概字元節豐城人幼孤隨母適胡氏冒其姓永樂九年進士授御史十六年擢廣西按察使峒谿蠻大出掠布政使議請靖江王兵遏之概不可曰吾等居方而寇至無扞禦顧煩王耶且寇必不至戒嚴而已已而果然

久之調廣東洪熙元年正月命以原官與布政使周幹
參政葉春巡視南畿浙江初夏原吉治水江南還代以
左通政趙居任兼督農務居任不恤民歲以豐稔聞成
祖亦知其誣罔既卒左通政岳福繼之庸懦不事事仁
宗監國時嘗命概以御史署刑部知其賢故有是命是
年八月幹還言有司多不得人土豪肆惡而福不任職
宣宗召福還擢概大理寺卿與春同往巡撫南畿浙江
設巡撫自此始浙西豪持郡邑短長為不法海鹽民平

康暴橫甚御史捕之遁去會赦還益聚黨八百餘人概捕誅之已悉捕豪惡數十輩械至京論如法於是奸宄帖息諸衛所糧運不繼軍乏食概以便宜發諸府贖罪米四萬二千餘石贍軍乃聞於朝帝悅諭戶部勿以專擅罪概用法嚴姦民憚之騰謗書於朝宣德二年行左都御史劾概與春所至作威福縱兵擾民帝弗問陰使御史廉之無所得由是益任概明年七月賜璽書獎勵概亦自信諸當興革者昏列以聞時屢遣部官至江

南造紙市銅鐵概言水滂民饑乞罷之五年還朝始復
姓亡何遷右都御史治南院事行在都御史顧佐疾驛
召概代領其職兼署刑部九年十月錄囚自朝至日宴
未暇食忽風眩卒賜祭給舟歸其喪概性剛決巡視江
南威名甚盛及掌臺憲聲稱漸損於初葉春者海鹽人
起家掾吏歷禮部郎中兩淮鹽運使改四川右參政與
概巡撫江浙諸府既復奉命與錦衣指揮任啟御史賴
英太監劉寧巡視先後凡三涖浙西治事於鄉人無議

其私者概遷都御史春同日進刑部右侍郎卒於官

陳鑑字有戒吳縣人永樂十年進士授御史遷湖廣副使歷山東浙江皆有聲英宗即位之三月擢右副都御史與都督同知鄭銘鎮守陝西北方饑民多流移就食鑑道出大名見之疏陳其狀詔免賦役正統改元鑑言陝西用兵民困供億派徵物料乞悉停免詔可明年五月以勞績下勅獎勵因命巡延綏寧夏邊所至條奏軍民便宜多所廢置所部六府饑請發倉振帝從輔臣請

修荒政鑑請徧行於各邊由是塞上咸有儲蓄六年春以鑑久勞於外命與王翱歲一更代七年翱調遼東鑑復出鎮歲滿當代以陝人乞留詔仍舊任時倉儲充溢有軍衛者足支十年無者直可支百年鑑以陳腐委棄可惜請每歲春夏時給官軍為月餉不復折鈔從之九年春進右都御史鎮守如故秦中饑乞蠲租十之四其餘米布魚收時衛拉特額森漸強遣人授罕東諸衛都督能格等為平章又置甘肅行省名號鑑以聞請嚴為

之備已命與靖遠伯王驥遮視甘肅寧夏延綏邊務聽
便宜處置以災沴頻仍條上撫安軍民二十四事多議
行鎰嘗恐襄漢間流民嘯聚為亂請命河南湖廣陝西
三司官親至其地撫恤之得旨允行而當事者不以為
意王文亦相繼力言有司怠忽恐遺禍至成化時乃有
項忠之役人益思鎰言英宗北狩景帝監國鎰合大臣
廷論王振於是振姪王山伏誅額森將入犯以于謙薦
出撫畿內事寧召還進左都御史景泰二年陝西饑軍

民萬餘人願得陳公活我監司以聞帝復命之鎰至是
凡三鎮陝先後十餘年陝人戴之若父母每還朝必遮
道擁車泣再至則歡迎數百里不絕其得軍民心前後
撫陝者莫及也二年春召還加太子太保與王文並掌
都察院文威嚴諸御史畏之若神鎰性寬恕少風裁譽
望損於在陝時明年秋以疾致仕卒贈太保謚僖敏天
順七年詔官其子伸為刑部照磨

李儀涿人永樂間以薦舉授戶部主事宣宗既平高煦

儀請去趙王護衛尚書張本亦言往歲孟賢謀逆趙王未必不知高煦亦謂與趙合謀儀言是帝不聽既而言者益衆帝封其詞遣使諭王如儀指王即獻護衛趙卒無事儀尋出知九江府有惠政英宗即位之歲始設諸邊巡撫僉都御史丁璿方督大同宣府軍儲而儀以右僉都御史巡撫其地盛有所建置明年請以大同東西二路分責總兵官羅文方政從之時朝議遣方政楊洪出塞與甘肅將蔣貴史昭合擊多爾濟巴勒儀言四裔

為患自古有之在備禦有方耳和寧殘部窮無所歸乍
臣乍叛小為邊寇邊將謹待之將自遁何必窮兵萬一
乘虛襲我少有失適足為笑乞敕政等無窮追不納督
糧參政劉璉不職儀劾之璉乃誣儀淫亂事適參將石
亨欲奏鎮守中官郭敬罪先咨儀儀誤緘咨牒於核餉
主事文卷中戶部以聞致亨敬相奏訐詔儀璉自陳而
切責敬等璉止停俸二歲儀雖引罪自負其直詞頗激
遂被劾下吏瘐死正統二年二月也儀居官廉謹邊人

素德之聞其死建昭德祠以祀丁璿上元人永樂中進士由御史擢居是職正統五年將征麓川命乘傳往備儲餉尋言用兵便宜遂命撫雲南麓川平召為左副都御史所至有聲

陳泰字吉亨光澤人幼從外家曹姓既貴乃復故舉鄉試第一除安慶府學訓導正統初廷臣交薦擢御史巡按貴州官軍征麓川歲取土兵二千為鄉導戰失利輒殺以冒功泰奏罷之再按山西時百官俸薄折鈔又不

能即得泰上章乞量增祿廩俾足養廉然後治賊汚則
貪風自息事格不行六年夏言連歲災異咎在廷臣請
敕御史給事中糾彈大臣去其尤不職者而後所司各
考覈其屬帝從之於是御史馬謹等交章劾吏部尚書
郭璉等數十人已復出按山東泰素勵操行好搏擊三
為巡按懲奸去貪威稜甚峻九年超擢四川按察使與
鎮守都御史寇深相失十二月八月參議陳敏希深指
劾泰擅杖武職毆輿夫至死逮刑部獄坐斬泰奏辯大

理卿俞士悅亦具狀以聞皆不聽景帝監國赦復官于
謙薦守紫荆闕額森入犯闕門不守復論死景帝宥之
命充為事官從總兵官顧興祖築闕隘自劾景泰元年
擢大理寺少卿守備白羊口四月都督同知劉安代寧
遠伯任禮巡備涿易真保諸城命泰以右僉都御史叅
其軍務三年兼巡撫保定六府尋命督治河道自儀真
至淮安濬渠八十里塞決口九築壩三役六萬人數月
而畢七年移撫蘇松天順改元罷巡撫官改廣東副使

以憂去四川盜起有言泰嘗莅其地有威名乃復故官
往巡撫八年進右副都御史總督漕運兼巡撫淮揚諸
府莅淮三年謝政歸成化六年卒

李崇字宗楷縉雲人宣德五年進士授刑部主事為尚
書魏源所器金濂代源以剛嚴懾下崇與辯論是非譴
訶不為動濂亦器之進員外郎錄囚南畿多所平反進
郎中景帝嗣位超擢本部侍郎未幾巡撫廣西提督軍
務所部多寇崇以次討平之正己帥下令行政舉景泰

三年思明土知府黃瑀老子鈞嗣瑀庶兄玘使其子殺瑀父子滅其家而以他盜為亂告崇檄右參政曾翬副使劉仁宅按其事翬等誘執玘父子下之獄玘寃則遣使走京師上書請帝廢太子立己子帝大喜立擢玘都督同知出其子於獄事具懷獻太子及土司傳崇既不_得竟黃玘獄鬱鬱累疏謝病歸不攜嶺表一物以清節顯曾翬字時升泰和人宣德八年進士治秦府永興王葬却有司饋遺歷刑部員外郎尚書金濂器之俾典奏

牘有重獄諸郎不能決輒以屬輩秦王訐巡撫陳鎰狎
妓輩按得其情劾藩府誣大臣鎰得白正統十三年進
郎中以何文淵薦擢廣西右參政李棠檄輩及副使劉
仁宅按黃珘父子珘使人持千金賄於道且擁精兵挾
之二人佯許諾已誘執珘下之獄棠以聞未幾珘以上
書擢都督同知父子俱出獄輩等太息而已尋以憂去
服闋起官河南御史清軍者利得軍多在及民輩辨釋
甚衆南陽諸府多流戶衆議驅逐人情惶急輩與巡撫

撫安之天順五年遷山東右布政使民墾田無賦者姦
民指為閒田獻諸戚畹部使者來勸翬曰祖制民墾荒
田永不科稅奈何奪之使者奏如言乃免成化初轉左
河南歲饑計開封積粟多奏請平糶貧民賴以濟召拜
刑部左侍郎仍食從二品俸尋巡視浙江考察官吏奏
罷不職者百餘人他弊政多所釐革還朝久之謝病去
翬操行謹所至有聲及歸生計蕭然絕跡公府鄉人以
為賢

賈銓字秉鈞邯鄲人永樂末進士宣德四年授禮科給事中數有叅駁英宗踐阼既肆赦復命獻在京重囚多所原宥從銓請推之南京秩滿出為大理知府王驥征麓川饋運有勞驥薦之麓川平擢雲南左參政仍知府事尋以驥言還治司事正統十二年左布政使闕軍民數萬人頌銓叅贊軍務侍郎侯璉等亦疏請銓遂得擢土官十餘部歲當貢馬輸差發銀及海肥八府民歲當輸食鹽米鈔至景泰初皆積逋不能償銓等為言除之

治行聞賜誥旌異景泰七年九載滿當入都軍民乞留
命還任天順四年與梁棻等舉政績卓異戶部初闕尚
書王翱欲擢銓帝問李賢賢曰聞其名未見其人也及
是來覲帝命賢視之還奏貌寢乃以為右副都御史巡
撫山東尋兼撫河南山東歲稔請召還清軍御史河南
饑請停徵課馬皆許之成化初左都御史李秉督師遼
東召銓署院事中官唐慎等從征荆襄還杖死淮安知
事谷淵自奏丐免銓請罪之乃付慎等司禮監命法司

罪其從人未幾卒官謚恭靖銓在雲南治行為一時冠
比為巡撫清靜不自表暴吏民亦安之

王宇字仲宏祥符人童州時日記萬言巡撫侍郎于謙
奇之登正統四年進士授南京戶部主事秩滿當轉郎
中吏部以宇才特用為撫州知府為政簡靜而鋤強遏
姦凜不可犯一府大治天順元年所司上其治行詔賜
誥命頃之擢山東右布政使命撫恤所屬饑民明年遷
右副都御史巡撫宣府中官嚴順都督張林等令家人

承納芻糧宇劾奏都御史寇深為解帝切責深尋命兼撫大同石亨及從子彪驕恣大同其舊鎮地徵索尤橫宇抗疏論其姦乞置之法疏雖不行聞者敬憚督餉郎中楊並不能備芻藁為宇所劾戶部庇之宇并劾尚書沈固等昏輸罪遭喪起復為大理卿固辭不許宇剛介所至有盛名居大理平反為多七年卒

崔恭字克讓廣宗人正統元年進士除戶部主事出理延綏倉儲有能聲以楊溥薦擢萊州知府內地輸遼東

布悉貯郡庫歲久朽敝守者多破家恭別構屋三十楹貯之請約計歲輸外餘以充本府軍餉遂放遣守者八百人額森犯京師遣民兵數千入援廷議城臨清檄發役夫恭以方春民乏食請俟秋成居府六年萊人以此漢楊震景泰中起遷湖廣右布政使諸司供給率取之民恭與僚佐約悉罷之公安監利流民擅相殺恭下令願附籍者聽否則迨秋遣歸衆遂定尋遷江西左布政使司有廣濟庫官吏乾沒五十萬恭白於巡撫韓雍典

守者咸獲罪定均徭法酌輕重十年一役遂為定例天
順二年寧王奠培不法恭劾之削其護衛王稍戢遷右
副都御史代李秉巡撫蘇松諸府按部進耆老言利病
為興革與都督徐恭浚儀真漕河又浚常鎮河避江險
已大治吳淞江起崑山夏界口至上海白鶴江又自白
鶴江至嘉定卞家渡迄莊家涇凡浚萬四千二百餘丈
又浚曹家港蒲匯塘新涇諸水民賴其利日曹家港為
都堂浦初周忱奏定耗羨則例李秉改定以賦之輕重

遞盈縮其例甚平而難於稽算吏不勝煩擾恭乃罷去
悉如忱舊吏部缺右侍郎李賢王翱舉恭遂召用置勸
懲簿有聞昏識之翱甚倚恭轉左父憂起復憲宗即位
乞致仕不允成化五年尚書李秉罷商輅欲用姚夔彭
時欲用王概而北人居言路者謂時實逐秉喧謗於朝
時稱疾不出侍讀尹直以時概皆已鄉人恐因此得罪
急言於輅以恭代秉越五月母喪歸服除起南京吏部
劾罷諸司不職者數人十一年春命參贊機務居三年

致仕又二年卒贈太子少保謚莊敏

劉孜字顯孜萬安人正統十年進士授御史出按遼東
景帝即位有建南遷議者孜馳奏乞斬言者以定人心
期滿當代朝議邊務方殷復留一歲再按畿輔時方築
滄州城以孜言罷擢山東按察使天順四年吏部舉天
下治行卓異按察使惟孜一人遷左布政使明年春以
右副都御史巡撫江南十府蘇松財賦自周忱立法後
代者多紛更孜首訪忱遺蹟斟酌行之民稱便成化元

年應天饑方振貸而江北饑民就食者衆致請盡發諸縣廩全活無算時民間多積困瀕江官田久廢沒仍責輸賦蘇松杭嘉諸府僉補富戶南京廊房既傾圯猶征鈔上元江寧農民代河泊所網戶採鱖魚應天都稅宣課諸司額外增稅江陰諸縣民戶償納荒租六合江浦官牛歲徵犢致昏疏罷之召拜南京刑部尚書以宋傑代四年致仕道卒致廉慎治事精審然持法過嚴時議其刻傑為人長者居二年罷去而邢宥代宥文昌人正

統十三年進士授御史出巡福建民十人被誣為盜當刑呼寃宥為緩之果得真盜天順中出為台州知府有治績坐累謫晉江丞憲宗復其職改知蘇州姦民攬納秋賦置之法得其贓萬緡以隄沙河甃官道大水民饑不待奏輒發米二十萬斛以振宥素廉介及治蘇嚴而不苛傑薦於朝詔加浙江左參政仍理府事賜璽書居半歲遂以右僉都御史代傑巡撫開丹陽河築奔牛閘省兌運冗費民以為便尋兼理兩浙鹽政考察屬吏奏

黜不職者百七十餘人居數載引疾歸

李侃字希正東安人正統七年進士授戶科給事中景
帝監國陳簡將才募民壯用戰車三事額森逼京師議
者欲焚城外馬草侃言敵輕剽無持久心乞勿焚免復
斂為民累昏報許時父母在容城侃曉夜悲泣乞假冒
險迎之景泰初議錄扈從死事諸臣後侃因言避難偷
生者宜嚴譴以厲臣節上皇將還與同官劉福等言禮
宜從厚忤旨被詰尚書胡濙為解乃已再遷都給事中

軍興減天下學校師儒俸廩侃奏復之戶部尚書金濂

違詔徵租侃論濂下之吏石亨從子彪侵民業侃請置

重典并嚴禁勲戚中官不得豪奪細民有司隱者同罪

帝宥亨彪餘如其請時給事中敢言者林聰稱首侃亦

矯抗有直聲廷議易儲諸大臣唯唯侃泣言東宮無失

德聰與御史朱英亦言不可時議壯之擢詹事府丞天

順元年改太常丞進太僕卿明年復設巡撫擢侃右僉

都御史巡撫山西奏言塞北之地與窮荒無異非生長

其間者未有能寧居而狎敵者也今南人戍西北邊怯風寒聞寇股票而北人戍南亦不耐暑多潛逃宜令南北清勾之軍各就本土補伍人情交便戎備得修時不能用奏發巡按李傑罪傑亦許侃按傑事有驗除名侃無贓罪獲宥六年考察屬吏奏罷布政使王允李正若以下百六十人因言諸臣年與臣若不堪任事者臣悉退之臣亦當罷詔不許侃性剛方力振風紀貪墨者屏跡其年冬以母喪歸軍民擁泣至不得行服除遂不出

家居十餘年卒侃事親孝好學安貧歿幾不能殮弘治

初國子生江紀等言前祭酒胡儼都御史高明李侃學

行事功彰者耳目並乞賜謚寢不行侃二子德恢嚴州

知府德仁河東鹽運使雷復字景暘湖廣寧遠人正統

初進士授行人歷官廣西副使藤縣民胡趙成構搖陷

縣治復與參將范信討斬之成化初以大臣會薦擢山

東右布政使七年徵拜禮部右侍郎尋改右副都御史

巡撫山西繼李侃後端恪守法得軍民心敗寇紅沙烟

再敗之烟寺溝石人村賜救獎勞時山西大侵而廷議以陝西用兵令預徵芻餉轉輸榆林復上言自山西至榆林道路險絕民齎銀往易價騰踴不免稱貸償責多破產今雨雪愆違饑民疾病流離困悴萬狀而應輸綾帛藥果諸物又不下萬計乞依山東例蠲除仍發帑振贍帝從之及發金三萬不足請鬻鹽四十萬引并令民入粟授散官皆報可十年夏卒於官李綱字廷張長清人幼從父入都陸車下車輟體過竟不傷人或異之登

天順元年進士授御史歷按南畿浙江劾去浙江賊吏至四百餘人時目為鐵御史奉敕編集陝西延綏土兵還遷太僕寺少卿巡畿輔馬政盡却有司饋按冀州遇盜問隸人曰太僕李公耶是何從得金不啟篋而去成化十三年遷右僉都御史轉左出督漕運與平江伯陳銳共事踰年卒銳見笥中惟敝衣揮涕曰君子也為具棺斂聞其清節於朝帝特命賜祭葬不為令綱清剛似李侃為時所重

原傑字子英陽城人正統十年進士又二年授南京御

史尋改北巡按江西捕誅劇盜姦宄斂跡復按順天諸

府大水牧官馬者乏芻馬多斃有司責償傑請免之開

中鹽引入米振饑疏入為部所格景帝卒從傑議起擢

江西按察使發寧王奠培淫亂事草其護衛治行間賜

誥旌異遷山東左布政使成化二年就拜右副都御史

巡撫其地歲凶振救民無流移召為戶部左侍郎時黃

河遷決不常彼陷則此淤軍民就淤墾種姦徒指為園

場屯地獻王府邀賞王府輒據有之傑請獻者謫戍并
罪受獻者從之江西盜起以傑嘗再莅其地得民詔往
治捕戮六百餘人餘悉解散改左副都御史還佐院事
荆襄流民數十萬朝廷以為憂祭酒周洪謨嘗著流民
圖說謂當增置府縣聽附籍為編氓可實襄鄧戶口俾
數百年無患都御史李賓以聞帝善之十二年遂命傑
出撫徧歷山谿宣朝廷德意諸流民欣然願附籍於是
大會湖廣河南陝西撫按官籍之得戶十一萬三千有

奇口四十三萬八千有奇其初至無產及平時頑梗者
驅還其鄉而附籍者用輕則定田賦民大悅因相地勢
以襄陽所轄鄖縣居竹房上津商洛諸縣中道路四達
去襄陽五百餘里山林阻深將吏鮮至猝有盜賊府難
遙制乃拓其城置鄖陽府以縣附之且置湖廣行都司
增兵設戍而析竹山置竹谿析鄖置鄖西析漢中之洵
陽置白河與竹山上津房咸隸新府又於西安增陽山
南陽增南召桐栢汝州增伊陽各隸其舊府制既定薦

知鄧州吳遠為鄖陽知府諸縣皆擇鄰境良吏為之流

人得所四境又安將還以地界湖廣河南陝西事無統

紀因薦御史吳道宏自代詔擢道宏大理寺少卿撫治

鄖陽襄陽荊州南陽西安漢中六府鄖陽之有撫治自

此始也傑以功進右都御史傑數敗厯於外既居內臺

不欲出荆襄之命非其意也事竣急請還朝會南京兵

部缺尚書以傑任之傑疏辭不許遂卒於南陽年六十

一鄖襄民為立祠詔贈太子太保錄其子宗敏為國子

生

彭誼字景宜東莞人正統中由鄉舉除工部司務嘗與尚書辯事無所阿景帝立用薦改御史從尚書石璞塞沙灣決河進秩二等復決再往塞之景泰五年以從大學士王文巡視江淮禽獲蘇州賊擢大理寺丞明年二月擢右僉都御史提督紫荆劄馬諸關劾都指揮胡璽納賄縱軍罪天順初罷巡撫官中朝有不悅誼者下遷紹興知府歲饑輒發廩振貸吏白當俟朝命誼曰民方

急安得循故事耶築白馬閘障海潮歷九載多惠政超擢山東左布政使入為工部左侍郎成化四年遼東巡擢張岐得罪吏部舉代者帝曰遼東自王翱後屢更巡撫多不稱可於大臣中求之乃改誼右副都御史以往鎮守中官橫徵諸屬衛誼下令凡文牒不經巡撫審定者所司毋輒行虐餓為息十年冬戶部檄所司開黑山閱場誼奏永樂中太監王彥等開是山督夫六千人三閱月止得金八兩請罷之遂止誼好古博學通律厯占

象水利兵法之屬平居謙厚簡默臨事毅然有斷鎮遼八年軍令振肅年未老四疏告歸家居四十餘年卒

牟俸巴人景泰初進士授御史巡按雲南南寧伯毛勝鎮金齒俸列其違縱罪將吏肅然天順元年出為福建僉事成化初進秩副使久之遷江西按察使政尚嚴厲入為太僕卿八年以左僉都御史巡撫山東歲稔請發濟南倉儲減價以糶令臨清闕稅收米麥濟振皆從之時大饑雖獲振饑民衆轉徙益多俸請救鄰境撫按隨

所在安輯秋成資遣復業又乞開中淮浙鹽百萬引盡
蠲州縣逋課詔如所請更命移臨清倉粟十萬石振之
至七月俸又言公私困竭救荒靡策乞開納粟例令胥
吏得就選富民授散官且截留漕糧備振十月復言今
救荒者止救其饑不謀其寒縱得食終不免僵死乞貸
貧民布帛帝皆嘉納俸又檄發東昌濟寧倉粟十萬餘
石為軍士月糧而以德州臨清寄庫銀易米振濟奏請
伏專擅罪帝特宥之已復以俸奏免柴夫折價銀移河

南輸邊粟濟山東而別給銀為邊餉山東輸京租二十萬石給本地用十年又饑請發倉儲出貸撫山東五年盡心荒政活饑民不可勝數以右副都御史改撫蘇松俸性嚴以所部多巨室欲故推抑之乃禁索私租勸富家出穀備振動千計怨謗紛然中官汪直有事南京或譖俸直歸未發也俸初在山東與布政陳鉞負氣不相下後鉞從容言俸短直信之十四年俸議事至京直請執俸下詔獄先是所親學士江朝宗除服還朝俸迓之

九江聯舟並下所至有司供張頗盛直因謂朝宗有所
闕說并下獄詞連僉事吳瑄等十餘人俱被逮繫獄半
歲謫戍湖廣俸在江西時共成許聰獄人多議其深文
至是被禍皆知為直誣然無白其寃者踰年卒戍所

夏堽字宗成天台人景泰二年進士授御史天順初巡
按福建繼清軍江西發鎮守中官葉達恣橫狀達為劾
咸以薦起擢廣東按察使時用師歲久役民守城堽至
悉遣之成化初奏狺獍弗靖用兵無功由有司撫字乖

方賊因得誘良民為徒黨劇寇數百脅從萬千進則驅之當前退則殺以抒憤害常在民而利常在彼況用兵不已供斂日增以易搖之人心責無窮之軍費恐外患未除內變先作請慎選監司守令撫綏遺民彼被脅之衆自聞風來歸帝深納其言尋遷布政使調江西八年以右副都御史巡撫四川苗獠時為寇壩立互知會捕法賊為之戢古州苗萬餘居爛土久時議逐之壩謂非計松潘參將堯或請益戍兵三千又力陳不可皆得寢

已奏所部將校多犯法奏請躡時輒至遁逸請先逮繫
然後奏聞帝可之堽剛介善聽斷所至民不寃在蜀二
年民夷畏服然厭繁劇與時多齟齬子鏃獻詩勸歸堽
欣然納焉年未五十即求退章四上得請既歸杜門養
親不接賓客又五年卒鏃舉進士弘治四年謁選入都
上書請復李文祥鄒智等官罷大學士劉吉忤旨下獄
得釋久之除南京大理評事疏論賦斂徭役馬政鹽課
利弊及宗藩戚里侵漁狀不報鏃素無宦情居官僅歲

餘念母老乞侍養遂歸家居三十餘年竟不復出

高明字上達貴溪人幼事母以孝聞登景泰二年進士授御史聞內苑造龍舟切諫有指揮為大臣所陷論死辯出之徐州民訴有司於朝時例越訴者戍邊明言戍邊防誣訴也今訴不誣法止當杖民有為妖言者吏貪功誣以謀反明按無反狀止坐妖言律皆報許巡按河南黜屬吏六十人再按畿輔入總諸道章奏天順初尚書陳汝言有罪偕諸御史劾下之獄四年御史趙明等

劾天下朝覲官觸帝怒詰草疏主名衆大懼明獨自承
都御史寇深言頻年章疏盡出明手幸勿以細故加罪
帝意解反稱明能石亨既誅僮僕皆收明言不宜坐免
者百人擢大理寺丞憲宗立拜南京右僉都御史以留
都春夏淫雨請修人事以回天意時納馬入監者至萬
餘人明請區別薦郎中孫瓊陳鴻漸梅倫何宜主事宋
瑛皆端方廉潔恬於進取宜顯擢以風有位疏下所司
成化三年揚州鹽寇起守兵失利詔明討之造巨艦名

曰籌亭往來江上督戰並江置邏堡候望賊蹤跡無所
匿遂平之內官鬻私鹽據法沒入鹽政大治因條上利
病十餘事多議行仍還原任以親老乞終養歸十四年
上杭盜發詔起巡撫福建督兵往討禽誅首惡餘皆滅
死遣戍以上杭地接江西廣東盜易嘯聚請析置永定
縣移疾徑歸久之卒

楊繼宗字承芳陽城人天順初進士授刑部主事囚多
疫死為時其食飲令三日一櫛沐全活甚衆又善辨疑

獄河間獲盜遣里民張文郭禮送京師盜逸文謂禮曰
吾二人並當死汝母老鮮兄弟以我代盜庶全汝母子
命禮泣謝從之文桎梏詣部繼宗察非盜竟辨出之成
化初用王翱薦擢嘉興知府以一僕自隨暑齋蕭然性
剛廉孤峭人莫敢犯而時時集父老問疾苦為祛除之
大興社學民間子弟八歲不就學者罰其父兄遇學官
以賓禮師儒競勸文教大興御史孔儒清軍里老多撻
死繼宗榜曰御史杖人至死者詣府報名儒怒繼宗入

見曰為治有體公但別姦弊勸懲官吏若比戶稽核則有司事非憲體也儒不能難而心甚銜之瀕行突入府署發篋視之敝衣數襲而已儒慙而去中官過者繼宗遺以菱芡歷書中官索錢繼宗即發牒取庫金曰金具在與我印券中官咋舌不敢受入覲汪直欲見之不可憲宗問直朝覲官孰廉直對曰天下不愛錢者惟楊繼宗一人耳九載秩滿超遷浙江按察使數與中官張慶忤慶兄敏在司禮每於帝前毀繼宗帝曰得非不私一

錢之楊繼宗乎敏惶恐遺書慶曰善遇之上已知其人
矣聞母喪立出止驛亭下盡籍解中器物付有司惟攜
一僕書數卷而還服除以右僉都御史巡撫順天畿內
多權貴莊田有侵民業者輒奪還之按行關塞武備大
飭星變應詔陳言厯指中官及文武諸臣貪殘狀且請
召還中官出鎮者益為權貴所嫉治中陳翼訐其過權
貴因中之左遷雲南副使孝宗立遷湖廣按察使既至
命汲水百斛洗滌廳事而後視事曰吾以除穢也居無

何復以僉都御史巡撫雲南三司多舊僚相見歡然既而出位揖之曰明日有公事諸君幸相諒遂劾罷不職者八人未幾卒繼宗力持風節而居心慈厚自處必以禮為知府謁上官必衣繡服朝覲謁吏部亦然或言不可笑曰此朝廷法服也而不服將安用之為為浙江按察時倉官十餘人坐缺糧繫獄至鬻子女以償繼宗欲寬之而無由一日送月俸至命量之則溢原數較他司亦然因悟倉吏缺糧之由將其實以聞衆懼請於繼宗

願捐俸代償由是十人者獲釋嘗監鄉試得二卷具朝服再拜曰二子當大魁天下吾為朝廷得人賀耳及拆卷王華李旻也後果相繼為狀元人服其鑑天啟初謚貞肅

贊曰明初以十五布政司分治天下諸邊要害則遣侯伯勲臣鎮扼之永樂之季敕蹇義等二十六人巡行天下安撫軍民事竣還朝不為經制宣德初始命熊概巡撫蘇松兩浙越數年而江西河南諸省以次專設巡撫

官天順初暫罷復設諸邊亦稍用廷臣出鎮或參贊軍務蓋以地大物衆法令滋章三司謹奉教條修其常職而興利除弊均賦稅擊貪濁安善良惟巡撫得以便宜從事熊概以下諸人強幹者立聲威愷悌者流惠愛政績均有可紀于謙周忱巡撫最為有名而勲業尤盛故別著焉

明史卷一百五十九

欽定四庫全書

明史卷一百五十九考證

陳泰傳景泰元年擢大理寺少卿

臣黃壽齡按大理

寺少卿雖有左右而品秩相同無甚關係傳刪寺字於官署稱名未合謹改右作寺後倣此

李棠傳景泰三年思明土知府黃瑯老子鈞嗣瑯庶兄
玠使其子殺瑯父子滅其家而以他盜為亂告棠檄
右叅政會翬副使劉仁宅按其事翬等誘執玠父子

下之獄玠窘則遣使走京師上書請帝廢太子立己
子帝大喜立擢玠都督同知出其子于獄

臣黃壽

齡按黃玠乃邊遠土司豈能知中朝意旨為此迎合
舉考之明實錄則當時主使之者乃侍郎江淵傳


詳載謹附識



總校官編修臣吳紹深

欽定四庫全書薈要

史部

明史卷一百六十二

二



詳校官員外郎臣潘紹觀

欽定四庫全書薈要卷六千七百五十三 史部

明史卷一百六十

大學士張廷玉等奉 敕修



列傳第四十八

王彰

魏源

金濂

石璞 王 沓

羅通

羅綺 張 固

張瑄

張鵬

李裕

王彰字文昭鄭人洪武二十年舉於鄉補國子生使山東平糴以廉幹稱擢吏科源士踰年革源士改給事中累遷山西左叅政永樂五年召為禮部侍郎父喪服除改戶部陝西大疫奉使祀西嶽新安民鬻子女償賦彰奏為蠲除贖還所鬻改右副都御史陝西僉事馬英激肅州番為變殺御史及都指揮彰劾英置極典又劾御史陳孟旭受賕枉法文獻盜銀課及金吾指揮李巖逐

母不養皆坐死他所論劾甚衆十一年從帝北巡彰有母年八十餘矣命歸省賜其母冠服金幣諭之曰君子居官不忘親居家不忘君凡所過民安否吏賢不肖悉以聞彰還奏事稱旨久之進右都御史十九年帝遣廷臣二十六人巡撫天下彰與給事中王勵往河南終明世大臣得撫鄉土者彰與葉春而已河南水災民多流亡長吏不加恤彰奏黜貪刻者百餘人罷不急之徵十餘事招復流民發廩振貸多所全活還朝命督餉北征

仁宗即位河溢開封命彰與都指揮李信往振恤宣德元年五月命彰自良鄉抵南京巡撫軍民尋以所言率常事降敕切責令詳具利病以聞復諭侍臣曰兩京相距數千里驛使往來為擾或遭水旱小民失所朝使還及御史巡歷皆不以告故遣彰往事今所奏多細故大臣如此朕復何望卿等悉朕意君臣同體其勿有所疑尋召還命與都督山雲巡山海至居庸諸闕隘踰二月還奏將士擅離伍者詔逮治遂命兵部三月一遣御史

給事中點閱明年四月卒於官彰嚴介自持請托皆絕然用法過刻其母屢以為言不能改時劉觀為左都御史人謂彰公而不恕私而不刻云

魏源字文淵建昌縣人永樂四年進士除監察御史辨松江知府黃子威誣奏減浙東瀕海漁課巡按陝西西安大疫療活甚衆奏言諸府倉粟積一千九十餘萬石足支十年今民疫妨農請輸鈔代兩稅之半從之涼州士寇將為變亟請勦亂遂息兩遭喪俱起復洪熙元年

出為浙江按察副使宣德三年召署刑部右侍郎五年

河南旱荒民多轉徙帝以源廉正有為命為左布政使

俾馳驛之任時侍郎許廓往撫輯廷議又起丁憂布政

使李昌祺原官源與廓昌祺發倉廩免逋賦雜役流民

漸歸雨亦旋降歲大豐居三年召還授刑部左侍郎明

年永豐民夏九旭等據大盤山為亂帝以源江西人命

撫之都督任禮帥兵隨其後未至官軍禽九旭因命二

人採木四川兼飭邊務英宗即位進尚書正統二年五

月命整飭大同宣府諸邊許便宜行事源遣都督僉事
李謙守獨石楊洪副之劾萬全衛指揮杜衡戍廣西明
年奏大同總兵譚廣老帝命黃真楊洪充為左右參將
協鎮諸將肅然按行天城朔州諸險要令將使分守設
威遠衛增修開平龍門城自獨石抵宣府增置墩堠免
屯軍租一年儲火器為邊備諸依權貴避役者悉括歸
伍尋以宣大軍務久弛請召還巡撫僉都御史盧睿而
薦兵部侍郎于謙為鎮守叅贊朝廷以謙方撫山西河

南不聽于是言官以臨邊擅易置大臣為源罪合疏劾之且言源為御史嘗犯贓及冒領誥命帝以源有勞置不問事竣還朝與都御史陳智相詈於直廬智以聞詔兩責之歲旱錄上疑獄且請推行於天下報可旋坐決獄不當與侍郎何文淵俱下獄得宥復以上遼王貴烺罪狀不言其內亂事與三司官皆繫詔獄累月釋還職源在刑部久議獄多平恕陝西僉事計資言武臣雜犯等罪予半俸謫極邊源以所言深刻奏寢之郎中林厚

言禁刁訟告訐及擇理刑官勘重囚務憑贓具四事皆以源議得施行六年以足疾命朝朔望八年致仕卒

金濂字宗瀚山陽人永樂十六年進士授御史宣德初巡按廣東廉能最改按江西浙江捕巨盜不獲坐免盜就執乃復官嘗言郡縣吏貪濁宜敕按察司巡按御史察廉能者如洪武間故事遣使勞賚則清濁分循良勸帝嘉納之用薦遷陝西副使正統元年上書請補衛所缺官益寧夏守兵設漢中鎮守都指揮使多議行三年

擢僉都御史叅贊寧夏軍務濂有心計善籌畫西陲晏然寧夏舊有五渠而鳴沙洲七星漢伯石灰三渠淤濂請濬之溉蕪田一千三百餘頃時詔富民輸米助邊千石以上褒以璽書濂言邊地粟貴請并旌不及額者儲由此充六年詔僉都御史盧睿與濂更代明年睿召還濂復出鎮尋加右副都御史與睿代者再八年秋拜刑部尚書侍經筵十一年安鄉伯張安與弟爭祿詔逮治法司與戶部相諉言劾濂濂及戶部尚書王佐右都御

史陳鎡侍郎丁竑馬昂副都御使丁璿程富等俱下獄
數日釋之福建賊鄧茂七等為亂都督劉聚都御史張
楷征之不克十三年十一月大發兵命寧陽侯陳懋等
為將軍往討以濂參軍務比至御史丁瑄已大破賊茂
七死餘賊擁其兄子伯孫據九龍山拒官軍濂與衆謀
羸師誘之出伏精兵入其壘遂禽伯孫帝乃移楷討浙
寇而留濂擊平餘賊未下者會英宗北狩兵事棘召還
言者交劾濂無功景帝不問加濂太子賓客給二俸尋

改戶部尚書進太子太保時四方用兵需餉急濂綜核無遺議上樽節便宜十六事國用得無乏未幾上皇還額森請遣使往來如初帝堅意絕之濂再疏諫不聽初帝即位詔免景泰二年天下租十之三濂檄有司但減米麥其折收餘布絲帛者徵如故三年二月學士江淵以為言命部查理濂內慚抵無有給事中李侃等請詰天下有司違詔故濂恐事敗乃言銀布絲帛詔書未載若槩減免國用何資於是給事中御史劾濂失信於民

為國斂怨且許其陰事帝欲宥之而侃與御史王允力爭遂下都察院獄越三日削官保改工部尚書吏部尚書何文淵言理財非濂不可乃復還戶部濂上疏自理遂乞骸骨帝慰留之東宮建復宮保尋復條上節軍匹及僧道冗食共十事五年卒官以軍功追封沭陽伯謚榮襄濂剛果有力所至以嚴辦稱然接下多暴怒在刑部持法稍深及為戶部值兵興財訕頗厚斂以足用云石璞字仲玉臨漳人永樂九年舉於鄉入國學選授御

史正統初歷任江西按察使三年坐逸囚降副使璞善
斷疑獄民娶婦三日歸寧失之婦翁訟壻殺女誣服論
死璞禱於神夢神示以麥字璞曰麥者兩人夾一人也
比明械囚趣行刑未出一童子窺門屏間捕入則道士
徒也叱曰爾師令爾偵事乎童子首實果二道士匿婦
槁麥中立捕論如法在江西數年風紀整肅雖婦豎無
不知石憲使者七年遷山西布政使明年以朝廷歲用
物料有司科派擾民請于折糧銀內歲存千兩令官買

辦庶官用可完民亦不擾從之十三年工部尚書王彥
以不能屈意王振致仕去璞為振所善遂召為尚書明
年處州賊葉宗留作亂總兵官徐恭等往討以璞參其
軍事師未至宗留已為其黨陳鑑胡所殺巡撫張驥招
降鑑胡賊勢稍息璞等逗遛無功為御史張洪等所劾
詔俟師旋以聞已而景帝嗣位召還論功兼大理寺卿
尋出募天下義勇還朝會中官金英下獄法司劾璞嘗
賂英遂并下璞獄當斬特宥之出理大同軍餉敵犯馬

營命提督宣府軍務至則寇已退還理部事加太子太

保給二俸河決沙灣命治之璞以決口未易塞別濬渠

自黑羊山至徐州以通漕艘而決口如故乃命內官黎

賢等偕御史彭誼助之于沙灣築石堤以禦決河開月

河二引水益運河以殺水勢決乃塞璞還言京師盜賊

多出軍伍間有獲者輒云糧餉虧減妻孥饑凍故又聞

兩載山東河南被災窮民多事剽掠不及今拊循恐方

來之憂甚於邊患口外守軍夜行晝伏艱苦萬狀今邊

疆未靖宜增餉以作士氣乃反減其月糧此實啟盜悞國之端非節財足用之術帝深納其言沙灣復決璞再往治之以母憂歸起復六年改兵部尚書與于謙協理部事明年湖廣苗亂命璞總督軍務與南和伯方瑛討之天順元年以捷聞召還命致仕既而論功賜鈔幣四年冬用李賢薦召為南京左都御史時璞已老瞶不能任事七年為錦衣衛指揮僉事門達所劾罷歸卒王蚤鄙人永樂中鄉薦歷山東左布政使所至有惠政正統

六年入為工部侍郎代吳中為尚書歸家十五年卒

羅通字學古吉水人永樂十年進士授御史巡按四川都指揮郭贊與清軍御史汪琳中交通為奸利通劾奏逮治之三殿災偕同官何忠等極陳時政闕失忤旨出為交趾清化知州宣德元年黎利反王通戰敗擅傳檄割清化迤西界賊賊方圍清化通與指揮打忠堅守乘間破賊殺傷甚衆賊將遁而檄至通曰吾輩殺賊多出城必無全理與就縛曷若盡忠死乃與忠益固守賊久

攻不下令降將蔡福說降通登陴大罵賊知城不可拔
引去及還京宣宗大獎勞之改戶部員外郎出理宣府
軍餉奏言朝議儲餉開平令每軍運一石又當以騎士
護行計所費率二石七斗而致一石今軍民多願輸米
易鹽請損舊例五分之二則人自樂輸餉足而兵不疲
帝可之正統初遷兵部郎中從尚書王驥整飭甘肅邊
務從破敵于烏拉納還以貪淫事為驥所覺驥遣通奏
邊情即䟽通罪下獄謫廣西容山閘官已調東莞河泊

所官九年都督僉曹儉薦其有文武才乞收用以吏部
執不可景帝監國以于謙陳循薦起兵部員外郎守居
庸闕俄進郎中帝即位進右副都御史顧森犯京師別
部攻居庸甚急天大寒通汲水灌城冰堅不得近七日
遁走追擊破之景泰元年召還時楊洪督京營命通參
軍務兼理院事言諸邊報警率由守將畏徵調飾詐以
惑朝廷遇賊數十輒稱殺敗數千向者德勝等門外不
知斬馘幾何而獲官者至六萬六千餘人輦下且然何

况塞外且韓信起自行伍穰苴拔於寒微宜博搜將士
中如信苴者與議軍事若今腰玉珥貂皆苟全性命保
爵祿之人憎賢忌才能言而不能行未足與議也意蓋
詆謙與石亨輩謙疏辨言槩責邊報不實果有警不奏
必致悞事德勝門外官軍升級惟武清侯石亨功次冊
當先者萬九千八百餘人及陣亡三千餘人而已安所
得六萬之多通以為濫宜將臣及亨等陞爵削奪有如
韓信穰苴者乞即命指薦并罷臣營務俾專治部事疏

下廷議廷臣共言謙及石亨楊洪實堪其任又謂通志
在滅賊無他帝兩解之尋敕謙錄功不得如從前冒濫
蓋因通言而發也給事中覃浩等言通本以知兵用不
宜理院事乃解其兼職塞上軍民多為寇所掠通請榜
諸邊能自歸者軍免戍守三年民復徭役終身又請懸
封爵重賞募能禽斬額森巴延特穆爾喜寧者已又言
古之將帥務搜拔衆才如知山川形勢者可使導軍能
騰高越險者可使覘敵能風角鳥占者可使備變今軍

中未見其人乞敕廷臣各舉所知命總兵官楊洪副將
孫鏜同臣考驗詔皆行之宣府有警總兵官朱謙告急
廷推都督同知范廣帥兵往以通提督軍務寇退駐師
懷來宣府以邊儲不敷召還六月于謙以山西近寇請
遣大臣往鎮楊洪亦乞遣重臣從雁門闕護餉大同帝
以命通通不欲行請得與謙洪俱謙言國家多難非臣
子辭勞之日奏乞躬往帝不允卒命通通本謙所舉而
每事抵牾人由是不直通二年召還仍贊軍務東宮改

建加太子少保上言貢使攜馬四萬餘匹宜量增價酬之價增則後來益衆此亦強中國弱外裔之一策帝以所貢馬率不堪用若增價正墮賊計寢通奏四年進右都御史贊軍務如故通好大言遇人輒談兵自陳殺賊功求世襲武職為給事中王竑所劾帝釋不罪天順初自陳預謀迎駕恐為石亨等所掩乃授其二子所鎮撫三年致仕成化六年卒賜祭葬如例

羅綺磁州人宣德五年進士英宗即位授御史按直隸

福建有能名正統九年參贊寧夏軍務踰年當代軍民
詣鎮守都御史陳鎰乞留以聞命復任尋擢大理右寺
丞參贊如故常以事劾指揮任信陳斌二人皆王振黨
十一年四月信斌訐綺不法事下總兵官黃真覆覈真
謂綺常詈宦官為老奴以激怒振召還京法司擬贖振
改令錦衣衛再鞫指揮同知馬順鍛鍊成獄謫戍遼東
景帝立綺訢寃不聽尋用尚書于謙金濂薦召復官進
右少卿副李實使衛拉特上皇還以勞擢刑部左侍郎

明年二月出督雲南四川軍儲已代寇深鎮守松潘賊
首卓勞糾他若阿兒結等頻為寇綺禽斬之土官王永
高茂林董敏相讐殺守將不能制綺搗永巢誅之又敗
黑虎諸寨番斬馘三百五十在鎮七年威名甚震天順
初召為左副都御史以功賜二品祿御史張鵬楊瑄劾
石亨亨謂綺與右都御史耿九疇使之并下獄降廣東
參政綺鞅鞅未赴明年閏二月綺鄉人告磁州同知龍
約自京還與綺言天子仍寵宦官刻香木為玉振形以

葬綺微笑云朝廷失政致吾輩降黜奏上捕綺下吏坐
死籍其家陳所籍財賄于文華門示百官家屬戍邊婦
女没入浣衣局憲宗立赦為民還其資產時與綺先後
鎮四川者張固字公正新喻人宣德八年進士正統初
授刑部給事中改吏科奉命撫裕州流民景泰改元給
事中李實請於四川行都司設鎮守大臣乃遷固大理
右少卿鎮建昌有政績三年還理寺事山東盜起奉命
督捕適霖潦災流人載道固盡心振卹盜賊弭散還卒

於官固在諫職敢言大臣多被彈劾又劾都御史陳鎰等舉屬官出身掾吏者為知府自是掾吏不得歷知府著為例英宗將北征偕同官疏諫復辟追念之已卒遣使諭祭官其一子子黼仕至廣西按察使

張瑄字廷璽江浦人正統七年進士授刑部主事歷郎中有能聲景泰時賜敕為吉安知府俗尚巫迎神無休日瑄遇諸途投神水中俄邁危疾父老皆言神為祟請復之瑄怒不許疾亦愈歲大饑陳牒上官不俟報輒發

廩振貸居八年用薦擢廣東布政使廣西右賊莫文章等越境陷連山瑄擊斬之又破陽山賊周公轉新興賊鄧李保等既而大藤峽賊頻陷屬邑瑄坐停俸成化初韓雍平賊錄瑄轉餉勞使銀幣給俸如初瑄按行所部督建預備倉六十二修陂塘圩岸四千六百增築廣州新會諸城垣一十二民德瑄惟恐其去既轉左布政使會滿九載當赴京軍民相率乞留巡撫陳濂等為之請乃仍故任八年始以右副都御史巡撫福建平賊林壽

六魏懷三等福安壽寧諸縣鄰江浙賊首葉旺葉春等
負險瑄捕誅之餘盡解散帝降敕勞之改撫河南議事
入都陳撫流民振滯才十八事所司多議行黃河水溢
瑄請振且移王府祿米於他所司多議行林餉濟荒石
取直八錢輸榆林民稱便還理院事尋遷南京刑部侍
郎久之進尚書二十年星變被劾帝弗問居三年給事
御史復劾之遂落職孝宗立復官致仕

張鵬字騰霄涑水人景泰二年進士授御史上疏言懷

利事君人臣所戒比每遇聖節或進羊馬錦綺交錯殿

廷自非貪賄安有餘財充進奉且陛下富有四海豈藉

是足國哉宜一切停罷塞諂諛奔競之途疏凡四事帝

頗採用出按大同宣府奏兩鎮軍士敝衣菲食病無藥

死無棺乞官給醫藥棺槨設義塚俾饗厲祭死者蒙恩

則生者勸帝立報可且命諸邊槩行之奏停淮揚征賦

給牛種天順元年同官楊瑄劾石亨曹吉祥鴈亦偕劉

泰魏瀚康驥論劾俱得罪下詔獄諸御史多謫官而鴈

瑄遼東項之赦免復戍南丹憲宗立廷臣交薦戍召復
原官尋超擢福建按察使成化四年以右僉都御史巡
撫廣西勦蠻寇有功其冬罷巡撫官命還理南京都察
院事改督漕運兼撫淮揚四府尋解漕務專理巡撫事
復還南京進副都御史巡撫寧夏召還歷兵部左右侍
郎才八年代陳鉞為兵部尚書守珠池宦官韋助乞往
來高肇瓊廉會守巡官捕寇鵬報不可帝竟許之南北
印馬率遣勛臣內侍後以災傷止遣御史是年帝復欲

遣內侍鵬等執不可帝免從之命俟後仍如故事鎮守大同中官汪直言小王子將大舉請發京兵援鵬等言大同士馬四萬已足用所請宜勿許且京軍困營造精力銷沮猝有急何以作威厲氣請悉其役可詔可尋加太子少保鵬初為御史剛直尚氣節有盛名後敷歷中外惟事安靜羣小竊柄閣臣萬安劉吉輩專營私鵬循職而已不能有所匡救二十一年星變鵬偕僚屬言傳奉武職至八百餘人乞悉令閒住非軍功無濫授四方

鎮守監槍守備內官非正統間原設者悉宜召還廷臣亦交以請下兵部覆覈鵬畏中官不敢堅其議帝遂盡留之時論皆咎鵬奸民章瑾獻珍寶得為錦衣鎮撫理刑缺鵬所上不允知帝意屬瑾即推用馬臺諫劾大臣不職者多及鵬鵬力求去遂賜敕給驛以歸弘治四年卒諡懿簡

李裕字資德豐城人景泰五年進士授御史天順中巡按陝西上安邊八事石彪濫報首功詔裕覈實彪從父

亨以書抵裕裕焚之以實聞亨亦旋敗由是有強直聲
都御史寇深遇僚屬嚴惟裕不為屈以才擢山東按察
使重囚二百餘人或經十餘年未判裕旬月間決遣殆
盡大峴山賊寨七十餘裕捕戮其魁縱脅從除其逋負
亂遂平成化初遷陝西左布政使入為順天府尹政聲
大著進右副都御史總督漕運兼巡撫江北諸府濬白
塔孟瀆二河以便漕張秋南旺及淮南西湖舊編木捍
衝激勞費無已裕與郎中楊恭等謀易以石遂為永利

淮鳳方饑而太僕徵預備馬二萬匹裕論罷之在淮六
歲每歲入計事陳利病多施行父憂歸服除留佐院事
十九年代戴縉為右都御史縉附汪直嘗請復立西廠
者也在臺綱紀不立裕欲振之御史有過或遭箠撻由
是得謗汪直敗偕副都御史屠滸請雪諸忤直得罪者
帝不悅奪俸又坐累調南京都察院考績副都留為工
部尚書初吏部尚書尹旻罷耿裕代之以持正不為萬
安所喜而李孜省貴幸用事欲引鄉人乃協謀去耿裕

以李裕代之裕本廉介負時望以孜省故名頗損其銓
叙亦平故事考察目有四曰考疾曰罷軟曰貪酷曰不
謹裕言人材質不同偏執類酷遲鈍類軟乞立才力不
及一途以寓愛惜人才之意帝善之遂著為令孝宗立
言官交章劾裕進由孜省裕不平為辨誣錄連疏乞休
去正德中卒年八十八

贊曰王彰等或以性行未純為時訾議綜其生平瑕瑜
互見然敷歷中外勞績多有可紀書稱與人不求備春

秋之義善善長則諸人固不失為國家幹濟材與

明史卷一百六十

欽定四庫全書

明史卷一百六十一考證

王彰傳擢吏科源士

臣

黃壽齡按職官志洪武六年

設六科給事中二十二年魏敏卓敬等凡八十一人
皆為給事中以其適符古元士之數改為元士未幾
又以六科為事之本源改元士尋復為給事中彰之
被擢適當其時但吏科非吏部也謹附考而並訂其

誤

金濂傳于是給事中御史劾濂失信于民為國歛怨且
訐其陰事帝欲宥之而侃與御史王允力爭遂下都
察院獄 臣黃壽齡按明寔錄載李侃面糾金濂格
詔徵斂之罪景泰欲宥之侃復膝行近前力爭不可
遂下獄是濂之罪寔侃一人發之傳云給事中御史
交劾與實錄異謹附考

張鵬傳成化四年以右僉都御史巡撫廣西勦蠻寇有
功其冬罷巡撫官命還理南京都察院事改督漕運

兼撫淮揚四府

臣

黃壽齡按明寔錄成化四年十

二月戶部郎中夏寅請各省以都御史一員統制一方戶部是其言議於浙江福建二處選都御史二員控制蓋以有刼取銀礦之事也憲宗不允於是有巡撫官不必設之語則是調鵬還京非罷之也職官志亦無成化間罷巡撫之文傳內紀載當有舛錯但原文未便削改謹考而識之

